

Tuesday, March 4, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

BUDGET

Finance changtu Chief Minister Pu Lalduhoma’n kum 2025-26 Financial Year-a Mizoram sum ruahman cheng vaibelchhe 15,198 leh nuai 76 chu Assembly-ah a pharh.

Kum kalta 2024-25 budget aiin kumin budget hi cheng vaibelchhe 786 nuai 64 in a tam zawk a, a punna hi za zela 5.4 a ni a, Budget Estimate 2024-25 zinga cheng vaibelchhe 13,835 leh nuai 42 chu house a pawm ngai a ni.

Pu Lalduhoma hian kumin Financial Year kal laia sum hman ruahman belhna Supplementary Demands for Grants 2024-2025 cheng vaibelchhe 3,512 leh nuai 33 chu a pharh nghal bawk a. Sorkar inrelbawlina senso, sorkar hnathawk hlawh leh pension bakah hmasawnna thawhna tur atana sum hman tur ruahman (revenue expenditure) hi cheng vaibelchhe 12,540 leh nuai 20 a ni a. Budget pumpui atanga chhutin za zela 82.51 a ni. Mipui hmasawnna atana sum ruahman (capital expenditure) atan cheng vaibelchhe 2658 leh nuai 55 dah a ni a, hei hi sum ruahman zawng zawng atanga chhutin za zela 17.4 a ni.

Chief Minister chuan sawrkar kum hmasa kum 2024 leh 2025 inkarah sum renchem, sum dinhmun in sawh nghehna kum an hman avangin nghawng tha tak tak a nei a ti a, India Sawrkar-in hmasawnna kawng atana a hmathlir, Viksit Bharat ti hlawhtling turin theihtawpin an inbuatsaih tih sawiin state in chhiah atanga sum a hmuh ang ang leiba rulh nan an hmang a ti a, sum leh pai enkawl kawngah harsatna tawh deuh mahse hma an sawn tih a sawi.

Chief Minister chuan Sawrkarin an dinhmun dik tak aia sang GSDP figure an nei thin chu tha anti lo a ti a, Tlahniam ta angina lan phah dawn mahse huaisen taka figure dik thei ang ber hmanga inteh a, nihna dik phochhuah an duh avangin kum 2024-25 GSDP Cheng Vbc 48037 leh nuai 52 chu Vbc 34003 leh nuai 27 ni zawk tura chhût chhuah a ni ta a, a hniamna Chu cheng Vbc 14034 leh nuai 25 ani tih sawiin figure zik zawk an hman tak avangin a inthlak tih a sawi.

Pu Lalduhoma chuan Mizoram economy than chhoh dan tarlangin sawrkar kum kal meka an thanna chu za zela 10.05% a ni a ti a, sawrkar kum lo awm turah za zela 10.21% a thang tura beisei an ni tih sawiin Kum 2025-26 chhunga fiscal deficit chu Cheng Vbc 1651 leh nuai 68 ani dawn a ti a, hei hi GSDP atanga chhûtin 4.57% a ni tih a sawi bawh.



CM – HANDHOLDING

Chief Minister Pu Lalduhoma’n kum 2025-26 chhungin Bana Kaih hnuaiah Cheng Vbc 350 an ruahman a ti a, kuthnathawktute chawikanna tura tangkai taka hman an tum tih a sawi.

Vawiina Mizoram budget a pharh zawh hnua Assembly House Annex Building, Conference hall ah thutharthehdarh tute kawmin Pu Lalduhoma chuan sawrkar kum kal mekah sawhthing chu Mizoram sawrkarin kuthnathawktute a leisak vek dawn a ti a, kumin tharchhuah chu hmaih awmlo in lei an tum tih sawiin tuna la hralh mai lo te pawhin lo cho sa loa, sawhthing chu leituten an sawhthing an lei hun tur lo nghak hram turin a duh thu a sawi a, kuthnathawktute hmasawna tur atan sawrkar kum tharah pawisa tam tak an dah tih a sawi.

Chief Minister chuan thlai thar 4 – sawhthing, hmunphiah, aieng leh hmarcha chu sawrkar kum tharah an chhunzawm leh dawn a ti a, hmachhawp thui tak kuthnathawktute tan an siam tih sawiin thlai dang lei tumna an la nei hrihlo a ti a, Bana Kaih hnuaia budget-a cheng vbch 350 an dah chu tun sawrkar kum kal meka hemi puala an dah Cheng Vbc 200 aiin 75% in a sang tih a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



CM –PRESS CONFERENCE

Chief Minister Pu Lalduhoma’n tun sawrkar kum kal mekah lei rem rap tura an inbuatsaihna atan Year of Consolidation a puan hnua hmasawna tam tak a thleng a ti a, State leiba cheng vbch 1003 leh nuai 94 laiin a tlahniam tih a sawi.

He thu hi Vawiina Assembly thutkhawma kum 2025 – 2026 inkara Mizoram budget tur a pharh na ah sawiin Chief Minister chuan sawrkar kum kal mek 2024-25 (Budget Estimate) ang chuan state leiba chu za zela 29.22% niin, leiba tling khawm chu Cheng Vbc 14034 leh nuai 76 a ni a ti a, hetihlai hian kumin vèk 2024-25 (Revised Estimate) ah chuan state leiba chu Cheng Vbc 13030 leh nuai 82 a ni tih sawiin Cheng Vbc 1003 leh nuai 94 zetin a tla hniam tih a sawi.

Pu Lalduhoma chuan Mizoram Universal Health Care Scheme atana kum kal meka an dah Cheng Vbc 20 chu Cheng Vbc 50 ah an tisang a ti a. State Lottery atanga an hmuh C heng Vbc 20 an dah thin bakah Cheng Vbc 30 belhin Cheng Vbc 50 chu dah ani tih sawiin medical reimbursement atana Department hrang hranga allocation an pek bakah, Cheng Vbc 100 an ruahman a ti a, hei hi Sawrkar hnathawkte’n medical bill rang zawka an lak theih nan leh, medical bill tling khawm tam lutuk thin pumpelhna atana ruahman a ni a ti a, Mizoram Universal Health Care Scheme chu kumin April ni 1 atanga kalpui tan an tum tih a sawi bawk.

